

Noticia
Transparente
di Gobierno

ISLA ONLINE

Dialuna 19 Februari 2024

Email: IslaOnline@gobierno.aw Tel: 528-4952

ARTE DI MURAYA
SAN NICOLAS



Gabinete Wever-Croes



Prome Minister a reuni cu departamentonan encarga cu vivienda social y general

LO BIN CU UN PLAN PA ELIMINA ESCASEZ DI VIVIENDA SOCIAL Y GENERAL NA ARUBA

"Nos meta ta pa trece solucion pa e problema aki y logra pa cada famia tin su hogar"

Manera ta conoci, na Aruba tin un scarcedad grandi di vivienda social y general, pa cu e problematica aki, Prome Minister Evelyn Wever-Croes, como minister encarga cu infraestructura, a reuni cu e departamentonan di DOW, DIP y Kadaster, hunto cu FCCA, cu ta e fundacion encarga pa construccion di viviendanan social, pa traha riba un plan pa elimina e escasez aki, y percura pa crea mas vivienda social na Aruba. E scarcedad di vivienda ta hopi mas grandi di loke FCCA por provee, y p'esey a reuni pa delibera riba ki otro alternativa por tin pa yena e necesidad aki.

Prome Minister a indica cu un di e retonan grandi ta, e disponibilidad di tereno na Aruba. Esaki ta conduci, cu lo mester bin cu otro forma di vivienda, y no manera Aruba ta custuma cu n'e. Comunidad ta custuma cu na Aruba casnan ta wordo construi riba un tereno, y cu cada cas tin su cura, pero mirando cu no tin suficiente tereno pa construi vivienda, lo mester bay traha cu otro metodonan. FCCA ta un fundacion cu hopi experticio den e ramo aki, ya cu nan a yega di traha vivienda cu ta bay na dos of tres piso, cu ta pega na otro riba un rij, dunando asina toch un espacio pa un cura chikito dilanti y patras di e cas. Un otro reto ta, cu hopi di e casnan a wordo bendi na stranheronan cu ta paga hopi placa pa nan. Esaki a distorciona e mercado, aumentando e balor di e casnan exageradamente, conduciendo asina cu hopi hende no ta bin na remarke pa cumpra of construi un cas.

Durante e reunion, a delibera riba varios opcion, y a evalua kico tur por wordo haci, pa mantene e prijs di e casnan pagabel pa comunidad. "Nos meta ta, pa trece solucion pa e problema aki, y logra pa cada famia tin su hogar. Apesar di tur e retonan riba nos caminda, nos tin confiansa cu nos lo surpasa nan, y cu nos ta exitoso", Prome Minister a expresa. ■■■



Prome Minister Evelyn Wever-Croes:

CONSEJO DI MINISTER A RICIBI PRESENTACION RIBA E SITUACION FINANCIERO DI ALGEMENE ZIEKTEKOSTEN VERZEKERING (AZV)


" Gobierno lo sigui lucha pa AZV tin e espacio financiero pa por sigui duna e bon cuida na e comunidad di Aruba"



Diabierna ultimo, durante un reunion cu Algemene Ziektekosten Verzekering (AZV), Consejo di Minister a ricibi un presentacion di e departamento, pa asina haya un bista riba e situacion financiero di AZV. Prome Minister Evelyn Wever-Croes a indica cu durante e reunion a bin dilanti e condicion cu Hulanda a pone durante e pandemia, pa corta Awg 60 miyon di AZV, pa asina Aruba por haya placa fia pa yuda esnan cu mas a wordo afecta pa e pandemia. E condicion aki a trece su consecuencianan den cuida di salud, pero a pone cu AZV a bay traha riba un modelo di con pa baha gastonan di cuida riba termino largo. Esaki sigur, teniendo na cuenta cu Aruba su poblacion ta enbeheciendo, y ta esnan mas halto di edad ta esunnan cu mas ta aci uzo di nos cuida medico, consecuentemente e gastonan ta sigui subi.

E meta di Gobierno ta pa tin un fondo di AZV solido, pa asina por sigui brinda e cuida basico y provee e remedinan basico cu tin mester. Prome Minister a expresa cu e modelo financiero presenta pa AZV, proyectando con e gastonan ta bay ta, ta hopi impresionante. Tambe nan a duna mas informacion di e acuerdonan nobo cu nan ta cerando cu esnan cu ta duna e servicio medico pa asina garantiza un bon cuida di salud.

Prome Minister a indica cu a base di e reunion aki lo sigui cu deliberacionnan cu Hulanda y CAft pa asina por yega na un protocol nobo entre Gobierno y AZV pa e siguiente añanan. Esaki lo trece claridad tanto pa Gobierno y AZV y na mes momento riba e posicion di Hulanda.

"Mi ta gradici tur esnan cu ta labora na AZV pa e tremendo trabou cu nan a bin ta haciendo pa sigura cuida medico y Gobierno lo sigui lucha pa AZV tin e espacio financiero pa por sigui duna e bon cuida na e comunidad di Aruba", Prome Minister a expresa. 





SCOL BASICO KUDAWECHA A HAYA SU HARDIN DI ALIMENTACION



Den un iniciativa pa inculca balornan di practicanan di agricultura sostenibel y importancia di siguridad di alimentacion den e siguiente generacion, Minister Arends a lansa un proyecto di agroforesteria na scolnan basico na Aruba. Diasabra 17 di Februari 2024, boluntarionan, maestronan, y studiantenan a uni forsa pa prepara un hardin di alimentacion na Scol Basico Kudawecha, marcando e di dos instalacion exitoso dentro di e proyecto aki.

E entusiasmo y esfuerzo colectivo di comunidad a haci e evento uno memorabel, demostrando e potencial pa educacion ambiental colaborativo.

E proyecto lo continua te cu juli unda lo evalua e siguiente etapa pa engrandece proyecto hunto cu Living Soil y Santa Rosa. E hardinnan aki no ta solamente un herment educativo, pero tambe ta sirbi como un empuhe pa muchanan haya e entusiasmo pa sigui planta na cas cu un mentalidad di provee pa nan mes.

“Mi ta increíblemente orguyoso di e pasion y dedicacion cu mi ta mira den nos comunidad escolar y boluntarionan,” segun Minister Ursell Arends, kende ta encarga cu Sector Primario. “E proyecto di agroforesteria na scolnan basico ta un paso importante den e direccion di un Aruba mas saludabel y consciente. Hunto, nos ta sembrando e simianan pa un futuro mas sostenibel.”

E exito di e proyecto te awor a ser logra den colaboracion cu Santa Rosa y Living Soil, hunto cu boluntarionan. Minister Arends ta extende un palabra di gradicimento na tur esnan cu a contribui na e proyecto den cualkier forma.

Ministerio di Naturalesa ta invita e comunidad pa uni bou di e proyecto di agroforesteria na scolnan basico cu esfuerzo continuo pa uza nos recursonan natural na un manera responsabel y educa nos muchanan riba e importancia di siguridad di alimentacion. ■■■





MINISTER MADURO A RICIBI BISHITA DI PRESIDENTE DI CORTE COMUN DI HUSTICIA



Diabierna pasa Minister Maduro di Finansa tabata tin e placer di por a ricibi bishita di Presidente di Corte Comun di Husticia, sr. Maurtisz de Kort hunto cu sr. Luttge kende ta encarga cu e parti financiero pa Corte Comun di Husticia.

Tabata un encuentro ameno den cual Minister Maduro a repasa un rato e recuperacion di Aruba den e ultimo añanan y a combersa tambe riba e retonan cu tin na e momentonan aki nan riba e tereno financiero di nos Pais.

Minister Maduro a haci uzo tambe di e ocasion pa asina gradici

Corte Comun di Husticia pa e solidaridad cu a keda demostra den e añanan 2020 pa 2024 den cual nan a ricibi menos fondo di aporte di parti di Aruba, pa asina brinda espacio pa nos por a stabilisa e finanzas di nos pais durante y despues di e pandemia.

Na final Minister Maduro como mandatario encarga cu monumentonan di Aruba, a gradici sr. De Kort y sr. Lutte tambe pa e hecho cu ta haci uzo y ta cuida di e Edificio di Corte cu ta un monumento di nos Pais cu ta cede di husticia na nos Pais ya pa mas di 50 aña. ■■■



**Gobierno di Aruba a decreta año 2024
como Año di Stabilidad y Prosperidad.**

**Esakinanan ta fundeshi cu e
generacionnan Arubiano prome cu nos
a bin ta preparando pa nos generacion.**

**Despues di e pandemia global di
COVID-19, nacionnan rond mundo a
encontra retonan sin precedente cu a
pone nan resiliencia y adaptabilidad na
prueba. Aruba, un perla den Caribe, a
sali di e periodo dificil no solamente
mas fuerte, pero tambe cu un vision y
compromiso renoba pa
Stabilidad y Prosperidad.**



CONSEHO DI MINISTER A RICIBI UN PRESENTACION DI MEERJAREN FINANSCIEEL KADER PLAN PA MANTENE E FONDO DI AZV SOSTENIBEL



Conseho di minister a ricibi un presentacion di Director di AZV, sr. Edwin Jacobs di e situacion financiero di AZV. A presenta e modelo cu ta yama “meerjaren financieel kader plan” como guia pa mantene e fondo di AZV uno sostenibel pa futuro.

Den e presentacion ta demostra cu e instrumento aki lo percura pa mantene e crecemento uno sostenibel y maneha e gastonan di fondo di cuido abou pa keda ofrece e seguro na e aseguradonan pa años cu ta bin.

Aña pasa a sera un acuerdo di Zorgakkord den sector di cuido

unda a subraya e necesidad y importancia di tin e meerjaren financieel kader, esaki ta un modelo cu ta pronostica e costonan di cuido te aña 2040, cual ta tuma na cuenta mas cu un total di 2,500 punto di atencion na momento cu ta calcula e entrada y gastonan di cuido.

Minister Dangui Oduber a keda impresiona cu presentacion y ta sumamente optimista cu lo yega na un seguro sostenibel y reposonsabel cu e instrument aki e “meerjaren financieel kader” cual ta algo historico pa Aruba y lo profesionalisa e manera di financia cuido na Aruba. ■



MINISTER

Geoffrey Wever

ARUBA INVESTMENT SUMMIT 2024 LO BUSCA PA ATRAE INVERSIONISTA HULANDES



Durante un conferencia di prensa dialuna mainta, Minister di Asuntonan Economico, Geoffrey Wever, ta anuncia cu e Aruba Investment Summit 2024 lo tuma lugar na Den Haag, Hulanda, riba dia 21 di maart proximo. E obhetivo principal di e summit ta pa presenta Aruba como e destinacion di inversion principal den Caribe y pa destaca e oportunidadnan cu nos isla tin pa ofrece.

Minister Wever a subraya e importancia di promociona Aruba como un destinacion di inversion atractivo, y a gradici tur esnan involucra pa nan esfuersonan pa haci e Aruba Investment Summit 2024 un realidad. AIS 2024 ta un esfuerso conhunto entre e Representacion di Hulanda na Aruba, VNO, Camara di Comercio di Aruba, Aruba Huis, y organisa pa unidad ARINA di Departamento di Asuntonan Economico.

E summit lo inclui discusionnan riba oportunidadnan di inversion den area di sostenibilidad, cual riba su mes ta transcede diferente industria. Tambe lo focus riba oportunidadnan pa Oranjestad y San Nicolas manera gastronomia, real estate, entretenimiento y mas.

Promocion extensivo pa e evento lo ser haci riba diferente plataforma di media, cu enfoke special riba inversionista potencial for di Hulanda y cercania. Organizacion y maneho di registracionnan pa e evento ta sera maneha pa ARINA. Lo presenta oportunidad pa comerciante y interesadonan participa tanto cara-a-cara, como tambe e opcion pa atende virtualmente via Microsoft Teams.



Pa mas informacion y detayenan tocante e Aruba Investment Summit 2024, por tuma contacto cu e Ministerio di Asuntonan Economico of bishita nan website oficial di www.investinaruba.com

Minister Geoffrey Wever kier a gradici tur esnan cu ta bai haci e Aruba Investment Summit 2024 un realidad. Sr. Vincent Storimans, Plaatsvervangend Vertegenwoordiger van Nederland in Aruba (VNO); Sr. Diederik Kemmerling, presidente di Camara di Comercio di Aruba; Sr. Ady Thijsen, nos Minister Plenipotenciario na Den Haag y e ekipo di Aruba Huis; Sra. Maria Pita-Dijkhoff y, directora di Departamento di Asuntonan Economico y su team di ARINA, Zuleika Quant y Bryan Lenzinger.



NOS A RICIBI PRESENTACION DI E RESULTADO PRELIMINAR DI E ESTUDIO RIBA RESTRUCTURACION DI E APARATO GUBERNAMENTAL



Recientemente, Minister Endy Croes a reuni cu Sra. Omaira Lares y Sra. Gabrielle Croes di Departamento di Recurso Humano (DRH). Durante e encuentro a trata restructuracion di e aparato gubernamental y e ministerionan. Manera ta conoci, Gabinete Wever - Croes II desde inicio di gobernacion ta tumando pasonan pa haci e aparato gubernamental mas eficiente y pa mehora mas ainda e servicio na nos ciudadanonan. Un di e recomendacionnan di e Landspakket ta pa haci un estudio di tur e departamentonan di gobierno.

E estudio aki a ser realiza pa PriceWaterhouse Coopers (PWC), entre otro, di e tareanan cu e departamentonan mester haci, cual por acopla na otro y cual no ta un tarea directamente di gobierno. Tambe, a pone atencion na e tareanan cu lo por wordo privatisa. Pa loke ta trata Ministerio di Enseñansa y Deporte tin nueve (9) departamento cu a pasa den e proceso aki. Siman pasa, Minister Endy Croes y Consejo di Minister a ricibi e prome conclusionnan di e estudio despues cu PriceWaterhouse Coopers (PWC) a reuni cu tur e departamentonan.



Hunto cu DRH lo tuma cierto decisionnan den e fase aki, entre otro, kico en realidad ta e tarea di gobierno y kico kisas no ta un tarea di gobierno. Pa conclui, mandatario di Enseñansa y Deporte a indica cu e tabata un bon reunion unda cu a repasa e nueve (9) departamentonan cu ta resorta bou di su ministerio y a duna contribucion den e proyecto aki. ■

Minister Endy Croes: E MODERNISACION PA UN "ELEKTRONISCHE KIND DOSSIER" LO GARANTISA CONTINUIDAD DEN GUIA, DESAROYO Y SALUD DI NOS MUCHA- Y HOBENNAN

Durante Conferencia di Prensa di Gobierno di Aruba, Minister Dangui Oduber hunto cu Wit Gele Kruis (WGK) a firma un convenio pa intercambio di informacion digital, esta "Elektronische Kind Dossier" (EKD) pa Jeugdgezondheidszorg (JGZ). E meta di e convenio aki ta pa garantisa continuidad den guia, desaroyo y salud di nos mucha- y hobennan. Durante e conferencia, Minister Endy Croes hunto cu colega Minister Dangui Oduber a hiba palabra. Tambe, dr. Janice Essers-Hooft y drs. Jan Hubert di JGZ a duna presentacion di modernisacion di e programa actual cu JGZ ta uza y con esaki lo transforma pa un sistema di registracion den forma di "cloud based". Manera ta conoci, WGK ta haci uzo di e experticio di "Jeugdartsen" di JGZ pa por ta samina y sigui e desaroyo di cada mucha entre di 0-5 aña. Despues di 5 aña JGZ ta sigui monitor e desaroyo y salud di e muchanan na scol basico y scol primario. E profesionalnan di JGZ pa medio di e file electronico lo por ricibi y comparti informacion pa un miho continuidad di cuido pa e mucha di 5 pa 22 aña.

E "Elektronische Kind Dossier" ta haci uzo di tecnologia, innovacion y e parti digital unda ta intercambia data di cada mucha pa facilita e proceso pa por sigui monitor e salud y e aspecto social di e muchanan. Cada mucha lo tin nan "social-medisch dossier" den un forma electronico. Modernisacion di e sistema aki lo percura pa registra cada caso di e muchanan, analisa y conserva den manera mas efectivo y eficiente pa nos profesionalnan den salud. Tambe, e modernisacion lo minimalisa foutnan den registracion, lo por haci e intercambio entre medico y psicologo mas facil. Departamento di Asuntonan Social tambe lo tin acceso na e data aki y for di tempran por nota si e mucha mester di ayudo y/of guia. Lo percura cu e protocol di privacidad ta uno estricto pa garantisa siguridad di nos muchanan.

Finalizando, Minister Endy Croes ta felicita colega Minister Dangui Oduber y Minister Rocco Tjon y henter nan ekipo cu a haci e proyecto aki posibel. Alabes ta gradici e profesionalnan, ekipo di maneho di DVG, JGZ, Wit Gele Kruis (WGK) y tur cu a traha riba e bunita proyecto aki y pa asina haci uzo di data pa por sirbi miho nos muchanan.



Minister Endy Croes:

E ESTUDIO DI SPORT AND EVENT MANAGEMENT DI UNIVERSITY OF SOUTH CAROLINA TA INICIA E PROME SIMAN DI MAART



Dialuna mainta, durante Conferencia di Prensa di Gobierno di Aruba, Minister di Enseñansa y Deporte Endy Croes a trata e topico di Sport and Event Management. Manera ta conoci, den luna di november di aña 2023, Minister Endy Croes a firma un acuerdo cu University of South Carolina pa brinda dies (10) persona di Aruba e oportunidad di sigui un estudio di Sport and Event Management riba nivel di Master.

E personanan cu completa e estudio aki lo ricibi un certificado y lo por yuda e federacionnan deportivo organisa diferente proyecto di turismo deportivo (sport tourism) aki na Aruba. Un team di tres (3) persona lo forma parti di e organisacion y lo yuda cu, entre otro, e peticion pa organisa evento, logistica, maneho di evento, skirbi rapport di evaluacion y relato financiero na final di e evento. E tabata un deseo y vision di Minister Endy Croes ta pa organisa un estudio riba nivel di Master di Sport and Event Management pa asina brinda comunidad e oportunidad pa organisa evento deportivo riba un nivel y standard internacional.

Esaki sigur lo contribui den futuro na e vision di turismo deportivo. Minister Endy Croes a indica cu den e vision di turismo deportivo (sport tourism) ATA, AHATA, Lotto pa Deporte y Gobierno di Aruba a aloca fondo pa eventonan internacional deportivo. Minister Endy Croes a indica cu e ta desea di cuminsa

cu dos (2) evento deportivo internacional pa aña. E estudio di Sport and Event Management ta inicia e prome siman di maart 2024 y lo ta parti den diferente seccion durante un periodo di seis (6) luna. Pues, esaki ta un gran proyecto cu lo brinda oportunidad pa siña lidera y organisa eventonan deportivo riba nivel internacional. ■■■■

SINTONISA

CONFERENCIA DI PRENSA DI GOBIERNO DI ARUBA

Gabinete Wever-Croes

DIALUNA Y DIAHUEBS | 10:00 AM

CELEBRACION

DIA INTERNACIONAL

PA HENDE MUHE



ACION

TOPICO

**INSPIRA
INCLUSION
DI HENDE MUHE**

FECHA

8 DI MAART, 2024

ORARIO

8:00 AM - 12:00 PM

LUGA

**RENAISSANCE CONVENTION
CENTER**

PA REGISTRA



Gabinete Wever-Croes

Cu e fundeshi di cada
inspiracion propio pa ta inclui,
e hende muhe ta sinti nan mes
empodera, motiva, eleva y importante.
Cada hende muhe cu ta inspira,
ta reconoce oportunidadnan
pa inspira otronan pa ta inclui.



Gabinete Wever-Croes

Murayanan na San Nicolas, cu un tempo tawata silencioso y senciyo, a bira inspiracion pa creatividad dinamico di varios artista. Cada arte di muraya ta un celebracion di diversidad, cultura y union, dunando bida na murayanan y transforma nan den obranan maestro.

2024

AÑA DI STABILIDAD Y PROSPERIDAD